

13

frisch und gesundt geen Lich kommen, und do er gehört,
das er so lange zeit für todt gehalten sei worden, ist er
den nechsten ins schlofs zu Lich gangen. So baldt in aber
die schwester also unversehenlich erblickt, do ist ir gleich
5 onmechtig worden, das menigclich mit ir zu thuen gehapt
und man in grosen sorgen gestanden ires lebens, bifs doch
sie zu letsten widerumb zu ir selbs kommen und widerumb
ist ufgebracht worden. Vergleicht sich vast der historia,
darvon der Titus Livius schreibt im [I] buch der [I] decad.
10 Man muefs zu zeiten den ernsthaftigen und laidigen fellen
auch guete schwenk und ander bossen anhenken, damit die
handlungen durch ainandern vermischet und der leser guet-
willig behalten werd, darumb ich iezgesagte und erzellte
bossen diesem capitel inverleibt.

15 Aber das ich wider uf mein vorige materia kom, so ist
das absterben der grefin von Hennenberg, grave Götfridt
Wernhers gemahl, dem stammen und nammen Zimbern ein
groser nachteil gewest und vil tausendt guldin schaden ge-
pracht; dann so sie ain halbs jar lenger in leben bliben,
20 het sie baide ire gebrüeder, graf Berchtolden und graf Al-
brechten, geerbet, oder da die gebrüeder gleichwol mit iren
testamenten fortgefare, were doch sie oder ire erben her-
nach zu einem billichern und bössern vertrag kommen. Hie-
bei kan ich nit underlasen zu vermelden, da grave Gotfridt
25 Wernher ein wenig zun sachen thuen wellen, het im graf
Berchtoldt Römhilt mit aller zugehördt verleibdinget, in
mafsen hernach mit denen von Mansfelden beschehen, dann
im grave Berchtoldt sollichs bei gueter zeit zugeschriben und
vor meniglichem angepoten. Wer ains gueten kaufs kom-
30 men und hets im iederman von seins gemahls wegen wol
gegunt; dann in zehen jaren hernach, die graf Gotfridt Wern-
her noch gelept, hat er ob den 20000 gulden ins hauptguet
verthon; sovil wer über das leibgeding nit gangen. Damit
manglt der stammen Zimbern der edlen herrschaft Römhilt
35 und ist das gelt darzu unnutzlich und unrümlich verthon.
Möglich, da sich Zimbern der herrschaft Römhilt under-
wunden, es were die herrschaft Schwarzach, die graff Al-
brecht von Hennenberg gehapt, auch darzu kommen. Aber
was nit sein soll, das schickt sich auch nit. Arm leut sollen

*

9 [I] und [I] die lücken der hs. so zu ergänzen, wenn anders die im ca-
pitel 16 von Julius Proculus erzählte erscheinung des Romulus gemeint ist.